



- * Ёшлар Президент ва Ватан тақдирига бепарқ эмас
- * Хоразмдаги тескари қараган ҳайкаллар
- * Балиқлар ҳам сувсиз яшай олиши мумкин
- * Ишдан "қисқартирилмайдиган" ходимлар кимлар?



Туркистон

Элим деб, юртим деб,  ёниб яшаш керак

1925 йилдан чиқа
бошлаган

ЎЗБЕКИСТОН ЁШЛАРИ «КАМОЛОТ» ЖАМҒАРМАСИ ГАЗЕТАСИ

1999 йил 20 февраль Шанба.
№ 14 (144205)

ПРЕЗИДЕНТ ОСТОНАГА ЖўНАБ КЕТДИ

19 февраль куни Ўзбекистон Республикаси Президенти Ислам Каримов Давлатлараро Кенгашининг навбатдаги мажлисида қатнашиш учун Қозоғистон пойтахти Остона шаҳрига жўнаб кетди.

Сафар олдида мамлакатимиз Президенти оммавий ахборот воситалари вакилларига интервью бериб, жумладан, шундай деди:

Маълумки, Ўзбекистон, Қозоғистон ва Қирғизистон Республикалари Абадий дўстлик тўғрисидаги Шартномага имзо чекади. Бу галги йиғилишда асосий эътибор мана шу муҳим ҳужжатнинг амалий ижросига қаратилади. Мазкур Шартнома доирасида ба- жарилган ишлар таҳлил қилиниши баробарида муштарак аҳамиятга молик муҳим масалалар юзасидан фикр алмашилади.

Дунёнинг турли минтақаларида юз бераётган иқтисодий бўҳрон тўғрисида кейинги пайтларда кўп гапириляпти. Остонада Қозоғистон ва Қирғизистон Президентлари билан мана шундай инқирозларнинг олдини олиш, уларнинг минтақамизга нисбатан таъсирини юмшатиш йўллари ҳам муҳокама қиламиз.

Очигини айтганда, минтақамиздаги барча мамлакатлар мустақил бўлсаларда, ўзаро алоқаларда эскича ёндашувлардан ҳали бутунлай ҳалос бўлинмагани баъзан сезилиб қолади. Мен ўзаро муносабатлар, барча суверен давлатлар орасида бўлганидек, мустақам қарор топиши тарафдориман. Ҳеч кимга сир эмас: Ўзбекистонда кўпгина халқ истеъмоли молларининг баҳоси кўшни давлатлардагига нисбатан анча арзон. Хўш, бу нимани кўрсатмоқда? Масалан, бизда шакарнинг нархи 5 ёки 10 сўмга ошиши билан айрим қўшнилари- мизда ундан ҳам зиёда ошади. Бозор иқтисодиёти қонуниятларидан маълумки, қаерда нарх-наво қиммат бўлса, маҳсулот ўша томонга қараб оқиб боради. Ўзбекистондаги арзончиликдан қўшилари- миз ана шу мақсадда фойдаланишаётгани ҳам биз учун сир эмас. Остонада бўладиган учрашувда шу масала юзасидан ҳам фикрлашиб оламиз.

Хабарингиз бор, биз чегара қўшилари ташкил этдик, эндиликда мамлакатимиз сарҳадлари муҳофазасини янада мустақамлашга жиддий эътибор

қаратмоқдамиз. Бироқ айримлар «Ўзбекистон ўз чегараларини ёпиб қўймоқда», деб ортиқча шов-шув кўтараётгани ҳам сир эмас. 16 февраль воқеалари бу борада кўраётган чора-тадбирларимиз нақадар тўғри эканини кўрсатди. Мен яна бир бор таъкидлашни истар эдим: чегараларимизни мустақам-лашдан кўзланган мақсад, аввало, мамлакатимизга ҳар хил экстремистик кучларнинг суқилиб киришига, сарҳадларимиздан ноқонуний равишда ўтиш, наркотик моддалар олиб ўтилиши ҳолларига чек қўйишдан иборатдир.

Маълумки, 1998 йил якуни ва 1999 йилда амалга оширилиши мўлжалланган чора-тадбирларнинг асосий йўналишларига бағишланган йиғилишда бир муҳим жиҳатга алоҳида эътибор қаратилди. У ҳам бўлса, биз учун доимо устувор бўлган халқни ижтимоий ҳимоялаш масаласидир. Биз илгари, асосан, макроиқтисодий кўрсаткичларни яхшилаш ва бошқа қатор иқтисодий йўналишларни устувор деб билар эдик. Лекин жорий йилда халқни ижтимоий жиҳатдан ҳимоя этишни энг асосий вазифамиз, деб қабул қилдик. Бундан кўзланган мақсад - «ислоҳот ислоҳот учун эмас, ислоҳот, аввало, инсон учун» деган қоида ўзининг тўла амалий ифодасини топишини таъминлашдан иборат. Биз ислоҳотларнинг умумий пойдеворини яратиш босқичини ортда қолдирдик. Эндиги вазифамиз навбатдаги устувор босқичларга ўтиб, белгиланган режаларнинг амалда изчил бажарилишини таъминлашдир. Бунинг учун тажрибамиз ҳам, салоҳиятимиз ҳам етарли.

Пойтахт аэропортида Президент Ислам Каримовни Ўзбекистон Республикаси Олий Мажлиси раиси Эркин Халилов, Бош вазир Ўткир Султонов, Тошкент шаҳар ҳокими Козим Тўлаганов ва бошқа расмий кишилар кузатиб қолди.

Кузатувчилар орасида Қозоғистон Республикасининг мамлакатимиздаги Фавқулодда ва мухтор элчиси У.Ўзбеков ҳам бор эди.

/ЎзА/

ИШОНЧ ҚАРВОНЛАРИ



Сураткаш А. РИСКИБЕВ. ЎзА

ТИНЧЛИГИМИЗНИ ҲЕЧ КИМ БУЗОЛМАЙДИ

16 февраль куни пойтахтимизда юз берган фожеали ҳодисалар бутун мамлакатимиз меҳнат аҳлида қаҳр-ғазаб уйғотди. Амалга оширилган қабиҳ жиноят давлатимиз раҳбаригагина эмас, балки бутун Ўзбекистон халқига нисбатан қилинган суиқасд деб ҳисоблаётган ҳар бир фуқаро тинчлигимизни бузишга уринаётган бузғунчиларга ўз нафратини билдирмоқда.

Ўзбекистон «Фидокорлар» миллий-демократик партиясининг кенгайтирилган йиғилишида ҳам айтиш мумкин гап борди. Унда партия Марказий Кенгаши аъзолари, партиянинг вилоят, шаҳар, туман котиблари иштирок этди. Йиғилишни партия Бош котиби Эркин Норбўтаев очди.

Сўзга чиққанлар 16 февраль куни пойтахтимизда жиноят содир этган бузғунчилар мамлакатимизда беқарорликни

вужудга келтиришга, тараққиёт йўлини тўсиш ва уни бошқа йўлга буриб юбориш, халқимиз тинчлигини бузиш ниятида қабиҳ ишга қўл урганлигини таъкидладилар. Аммо улар мақсадга етолмадилар. Бу воқеаларнинг барчаси жойларда эндиликда бошланғич ташкилотларини тузаётган «Фидокорлар» партияси ишида сабоқ, ўз фаолиятини қайта қўришда муҳим туртки бўлиши кераклигига эътиборни қаратдилар.

Йиғилишда партия Марказий Кенгаши аъзоси, Ўзбекистон Республикаси Президентининг Давлат маслаҳатчиси Н.Жўраев сўзга чиқди.

Йиғилиш қатнашчилари мамлакатимиз Президенти Ислам Каримов номига Мурожаатнома қабул қилдилар.

/ЎзА/

